

12 DEC 2000

Mahathir-Muzium

MAHATHIR RASMI PAMERAN SURAT NIKAH PARSI

KUALA LUMPUR, 12 Dis (Bernama) -- Perdana Menteri Datuk Seri Dr Mahathir Mohamad hari ini merasmikan pameran "Kemurniaan Seni Perkahwinan - Surat-surat Nikah Parsi Dinasti Qajar" di Muzium Kesenian Islam di sini.

Pameran itu, yang diadakan untuk muzium itu dan Pertubuhan Arkib Negara Iran (INAO) oleh Dr Mandana Barkeshli dari muzium itu, akan menampilkan hampir 80 surat nikah yang diilustrasikan dengan cantik sepanjang kurun ke-18 dan ke-19.

Surat-surat nikah itu akan dipamerkan kepada umum buat pertama kalinya, dengan Malaysia adalah destinasi pameran pertamanya di dunia.

Surat nikah itu antara lain mengandungi lafaz nikah, butiran barang hantaran dan surah-surah al-Quran. Pameran di muzium itu berlangsung sehingga 11 Mac 2001.

Dalam ucapannya, Dr Mahathir berkata pameran itu dapat diadakan dengan kesudian INAO meminjamkan dokumen-dokumen berharga kepada Muzium Kesenian Islam.

"Ini membolehkan pihak muzium membawa sebanyak mungkin pameran ke sini, contohnya Kesenian Islam yang terbukti sangat popular di kalangan ramai orang, bukan sahaja umat Islam," kata beliau.

Mengenai pameran itu, Dr Mahathir berkata beliau berasa gembira kerana masih dapat memperkatakan tentang kesucian perkahwinan pada masa ia tidak lagi dianggap suci di kebanyakan tempat di dunia.

Perdana Menteri berkata beliau berharap kesucian dalam ikatan pasangan suami isteri akan dapat dipulihkan semula.

"Perkahwinan bukan sahaja untuk keseronokan semata-mata tetapi juga merupakan satu pemerolehan. Malangnya, di kebanyakan tempat di dunia, ia adalah satu sumber keseronokan," kata beliau.

Dr Mahathir berkata banyak kejadian berlaku dengan lelaki dan perempuan lebih cenderung untuk hidup bersama tanpa ikatan perkahwinan dan mempunyai anak apabila mereka mahu.

"Kadang kala, mereka akan hanya berkahwin setelah anak-anak sudah besar. Mereka mahu anak-anak mereka menjadi saksi perkahwinan mereka," katanya.

Beliau berharap pameran itu akan membolehkan orang ramai memahami tentang kesucian sesebuah perkahwinan.

Sesetengah daripada surat nikah yang dipamerkan itu adalah dalam bentuk buku kecil manakala manuskrip individu boleh digantungkan di dinding. Amalan mengubah surat nikah menjadi hasil seni yang cantik telah menjadi satu tradisi di Iran.

-- BERNAMA

AR AR NAK